



册府元龜

卷之九百五十四
至六十六



13
849
307



明 1 3
號 849
卷 307



册府元龜

入於對... 淮南李嗣京參閱

吳... 西極文翔鳳訂正

豫章黃國琦較釋

總錄部 二百四

寡學 虛名 妄作 愚暗

寡學

溫故知新好問則裕為學之益蓋君子之所急也乃
有愚昧成性宴安任已靡思時習之義不念將落之
刺憊厥古道束於常見繇是言致無稽之誚動成踰

矩之咎為儒者之所恥曷士林之可預古人有言曰人而不學其猶正墻面而立也蓋謂是矣

宰予字子我魯人哀公問社於宰我宰我對曰夏后

氏以松殷人以栢周人以栗曰使民戰栗凡建邦立社各以其

士所宜之木宰我不本其意妄為之說因周用栗便云使民戰栗

說事已成不遂事不諫事已遂不既往不咎事已往不可復

追也孔子非宰我故歷言此三者欲使慎其後

吳勝脩為廣州刺史或語脩蝦鬚長一丈脩不信其

人後故至東海取蝦鬚長四丈四尺封以示脩脩乃

服之

晉蔡謨為司徒謨初渡江見彭蠡大喜曰蟹有八足

加以二螯令烹之既食吐下委頓方知非蟹後詣謝

尚而說之尚曰卿讀爾雅不熟幾為勤學死

虞嘯父為侍中孝武從容問曰卿在門下初不聞有

所獻替邪嘯父家近海謂帝有所求對曰天時尚溫

蟹魚蝦鮓未可致尋當有所上獻帝大笑

唐蘇良嗣為荊州都督郭下舊有河東寺後梁宣帝

為其兄河東王與所立也良嗣見而驚曰此在江漢

之間與河東有何關涉遂奏改之繇是議者譏其學

之不博也

蕭炤爲戶部侍郎嘗與嚴挺之同行慶弔客次有禮
記卷炤讀之曰蒸嘗伏獵炤早從官無學術不識伏
臘之意誤讀之挺之戲問炤對如初挺之白張九齡
曰省中直得有伏獵侍郎繇是出爲岐州刺史
李林甫爲吏部侍郎時選人嚴迥判語有周杖杜二
字者林甫不識杖字謂吏部侍郎卓陟曰此云杖杜
何也陟俛首不敢言太嘗少卿姜虔林甫舅子虔妻
誕子林甫手書慶之曰聞有弄聲之慶客視之掩口
王鏐爲太原節度使嘗讀左氏傳自稱儒者人皆笑
之

後唐李鏐爲宗正卿初趙州昭慶縣有神堯之祖獻
祖宣皇帝建初陵懿祖光皇帝啓運陵莊宗踐祚之
後宗正司條奏陵園故事請置建初啓運陵臺令許
之時有僞稱宗子言世爲丹陽竟陵臺令投詣宗寺
爲聞喜令宗正少卿李瓊莫測其繇憑百姓僞書卽
而補之其人旣至本處招庇百姓以爲部曲出入建
絳旌豪視長吏復侵奪近墓民田百餘頃言是陵園
墟地百姓詣府陳訴州府不能辨疑乃具狀奏天子
下公卿訪丹陽竟陵故事是何帝陵寢遂簡列聖陵
園及追封錄太子諸王尊號者皆無丹陽竟陵之號

其僞百姓宗正司吏皆伏法瓊鑄以不閑故實謬補
姦人鑄責授朝散大夫司農少卿瓊責授朝議郎守
太子中舍丹陽之地北在南方竟陵之名六朝故事
鑄等不知書故也

李琪為太子少傅明宗天成末既平定州自汴還維

琪為留司官班首奏乞於偃師縣奉迎而奏章中有

敗契丹之兇黨破真定之逆賊之言詔曰契丹即為

兇黨真定不是逆賊李琪罰一月俸

史臣曰大駕還京留司官出城奉迎載於典禮李琪好動移班師稱中山為真定踈人之詞俱失實也

馬縞為國子祭酒時年八十餘形氣不甚衰而於事

多遺忘嘗言元稹不應進士以父元魯山名進故也

多如此類又上疏古者無嫂叔服文皇創意以兄弟

之親不宜無服乃議服小功今令文省服制條為兄

弟之妻大功不知何人議改而寘於令文諸博士駁

云律令國之大經馬縞知禮院時不曾論定今遽上

疏駁令式罪人也

周盧損為太子少保致仕損梁開平初舉進士性頗

剛介以高情遠致自許儕類之中務欲自勝然學涉

不博以此為人士所薄

虛名

夫名浮於行聲過其實先民用恥小人爭驚蓋繇不
純其德務飾其詐身為芥藻言生枝葉苟合於世寔
以成風大則朋扇相高日彰浮稱次則矜持自用徒
術諛聞詭誕則多循實何有或誤聽而進擢或從權
而委任罔獲攸濟終敗乃事是知膠柱鼓瑟詎能合
變畫地作餅不可以啖者矣

漢東方朔為侍郎詎諧逢占射覆逢占逆占事猶云逆刺也其事

浮淺行於衆庶童兒牧豎莫不眩耀而後世好事者

因取奇言怪語附著之劉向言少時數問長老賢人

通於事及朔時者與朔同皆曰朔口諧倡辯不能持

論喜為庸人誦說喜許吏反為去聲故令後世多傳聞者而

楊雄亦以為朔言不純師行不純德其流風遺書蔑

如也言辭義淺薄不足稱也然朔名過實者以其詼達多端不

名一行

王成為膠東王相宣帝最先褒成後詔使丞相御史

問郡國上計長吏守丞以政令得失或對言前膠東

相丞僞自增加以蒙顯賞是後俗吏多為虛名

魏鄧颺為中書郎颺少得士名于京師與李勝等為

浮華友與諸葛誕等馳名譽有四胞八達之誚文帝

疾之

文欽爲將好自壯勇高人頗得虛名于三軍

諸葛誕爲御史中丞與尚書夏侯玄鄧颺等相善收
名朝廷京都翕然言事者以誕颺等修浮華合虛譽
漸不可長明帝惡之免誕官

蜀許靖爲劉璋蜀郡太守先主進圍成都靖將踰城
降事覺不果璋以危亡在近故不誅靖璋旣稽服先
主以此薄靖不用也法正說曰天下有獲虛譽而無
其實者許靖是也然今主公始創大業天下之人不
可戶說靖之浮稱播流四海若其不禮天下之人以
是謂主公爲賤賢也宜加敬重以眩遠近追昔燕王

之待郭隗先主於是乃厚待靖

諸葛瞻以丞相亮之子爲尚書僕射加軍師將軍蜀
人追思亮咸愛其才敏每朝廷有一善政佳事雖非
瞻所建倡百姓皆傳相告曰葛侯之所爲也是以美
聲溢譽有過於實

晉王衍爲太子中庶子衍旣有盛才累居顯職後進
之士莫不景慕放效選舉登朝皆以爲稱首矜高浮
誕遂成風俗焉

謝萬太傅安之弟雖器量不及安而善自衒矜故早
有時譽後至豫州刺史

王綏字彥循少有美稱厚自矜遇實鄙而無行後至
冠軍將軍

宋劉休爲南康相善言理體而在郡無異績

後魏和跋爲龍驤將軍累遷尚書平原太守道武寵
遇跋冠於諸將時羣臣皆敦尚恭儉而跋好修虛譽
銜曜於時

劉仁之爲御史歷西交州刺史善候當途能爲詭激
每於稠人廣衆之中或搥一姦吏縱一孤寡大言自
示眩已高明矜物無知淺識皆稱其美公能之譽動
過其實

唐房瑄爲吏部尚書平章事肅宗以瑄素有重名傾
意待之瑄好賓客喜談論用兵素非所長而天子採
其虛聲冀成實效瑄旣自無廟勝又以虛名擇將吏
以至于敗

後唐張文禮初爲鎮州大將從莊宗行營素不知書
亦無兵家方畧唯於懦卒中萋菲上將自言甲不知
進退乙不識兵機以此軍人推爲良將

周李知損爲諫議大夫在梁朝時以賤刺篇詠出入
于內臣之門繇是浪得虛譽時人目之爲李羅隱

妄作

古人有言鄙没世而文采不表於後故感於哀樂而造其端緒苟非侈靡閱行周通博達豈能為學者之所宗乎乃有不祖述於前典妄穿鑿於聖意言涉鄙俗義多詭詐雖確然自是而行之非遠布諸後世良可媿焉

漢孟喜東海蘭陵人從田王孫受易喜好自稱譽得易家侯陰陽災變書詐言師田生且死時枕喜鄰獨傳喜鄰與同門梁丘賀疏通證明之同門同師學者別也證明明其偽也曰田生絕施讎手中時喜歸東海安得此事又蜀人趙賓好小數書後為易飾易文以為箕子

明夷陰陽氣亡箕子者萬物方茲茲也易明夷卦彖曰內文明而

外柔順以蒙大難文王以之利艱貞悔其明也內難而能正其志箕子以之而六五爻辭曰箕子之明夷利貞此箕子者謂殷父師說洪範者也而賓妄為說耳茲茲言其根茲方茲茂也茲音該又音皆

持論巧惠易家不能難皆曰非古法也心不云受孟喜喜為名之名之者亟取其後賓死莫能持其說喜

因不肯何何亦名也以此不見信

晉魏瓘為司空作左思為吳都賦敘及注敘粗有文辭至於為注了無所發明直為塵穢紙墨不合傳寫也

束皙為尚書即嘗為勸農及進諸賦文頗鄙俗時人

薄之

後魏張吾貴中山人年八十本郡舉爲太學博士吾貴先未多學乃從酈詮受禮牛天祐受易詮祐粗爲開發而吾貴覽讀一遍便卽別構戶牖世人競歸之曾在夏學聚徒千數而不講傳生徒竊云張生之於左氏似不能說吾貴聞之謂其徒曰我今夏講暫罷後當說傳君等來日皆當持本生徒怪之而已吾貴謂劉蘭云君曾讀左氏爲我一說蘭遂爲講三句之中吾貴讀杜服隱括兩家異同悉舉諸生後集便爲譏之義例無窮皆多新異蘭仍伏聽學者以此益奇

之而以辨能飾非好爲詭說繇是業不久傳

成霄字景鸞亦學涉好爲文詠但詞彩不倫率多鄙俗與河東姜質等朋遊相好詩賦間起知音之士共所嗤笑間巷淺識頌諷成羣乃至大行於世

北齊劉晝渤海阜城人河清初舉秀才考策不第乃恨不學屬文方復緝綴辭藻言甚古拙制一首賦以六合爲名自謂絕倫吟諷不輟乃嘆曰儒者勞而少工見於斯矣我讀儒書二十餘年而答策不第始學作文便得如是曾以此賦呈魏收收謂人曰賦名六合其愚已甚及見其賦又愚於名晝又撰高才不遇

傳三篇在孝昭武成之朝又頻上書言亦切直而多非世要終不見收採

石曜爲黎陽郡守著石子十卷言甚淺俗

隋張仲讓爲太學博士未幾告歸鄉里著書十卷自云此書若奏我必爲宰相又數言玄象事州縣列上其狀竟坐誅

唐東方震德州人玄宗開元十三年與鄭帝臣獻書詞理虛矯徙於道州

南次回爲國子監學生肅宗寶曆元年進皇帝親學圖一軸初太學博士李涉狂妄誘生徒上疏請親臨

國庠因有詔令畫圖以進事尋不行

後唐王思同初仕莊宗歷典諸軍至都將性疎俊粗有文性喜爲詩什與人唱和自稱薊門戰客魏王繼岌待之若子時內養呂知柔侍與聖宮頗用事思同不平之知柔爲終南山詩末句有頭字思同和曰料伊直擬衝霄漢賴有青天壓著頭其可笑詩句皆此類也

晉崔居儉爲戶部尚書其先自後魏至唐推爲甲族吉凶之事自著家禮與盧鄭不同但浮薄是務淳儒惡之

愚暗

夫愚暗之徒與賢知並生于世亦繇樗櫟之與杞梓
瓦石之與珠玉也故含英炳靈者爲賢知積污蘊濁
者爲愚暗則有罔達人情靡周世務動爲欺給靡達
變通至乃畏乎影者見月而却走失乎劍者刻舟而
待求取柳葉以自蔽謂南金之可食其底滯之性有
如此者其或應對失指率履過中言有遠於典刑動
必爲於嗤笑紀諸竹素良足憮然

燕李季好遠出其妻有士李季至士在內中妻患之
乃令士裸而解髮立出門吾屬陽不見也於是士從
其計疾走出門季曰是何人也家室皆曰無有季曰
吾見鬼也季婦曰爲之奈何然取五牲之毛浴之季
曰諾乃浴矣

滄濁梁夏首之南人也其爲人愚善畏明月而宵行
宵見其影以爲伏鬼仰見其髮以爲伏魅匍匐而走
比至其家失氣而死

公孫綽魯諸孫也嘗告人曰我能治偏枯今吾倍爲
偏枯之藥則可以起死人矣

楚人有涉江者本不載姓名其劍自舟中墜於水遽
鍥其舟曰是吾劍所從墜也舟已行而劍不行若此

求劔不亦惑乎

宋人有耕者本不載姓名田中有株兔走觸之折頭而死因釋耕守株冀復得兔爲宋國笑

後漢劉玄王莽末爲綠林渠帥號爲更始旣至長安諸將後至者更始問虜掠得幾何左右侍官皆宮省久吏各驚相視

董卓獻帝初自爲太尉領前將軍及逼帝遷都長安卓乃結壘於長安城東以自居又築塢于郿高厚七尺號曰萬歲塢積谷爲三十年儲自云事成雄據天下不成守此足以畢老後王允與呂布及僕射士孫

瑞謀誅卓有書曰字于布上負而行於市歌曰布乎有告卓者不停

公孫瓚爲遼東太守破擒劉虞盡有幽州之地猛志益盛以童謠之言徙鎮易縣盛修營壘樓觀數十臨易河通遼海瓚慮有非嘗乃居于高京以鐵爲門斥去左右男子七歲已上不得入易門專侍姬妾其文簿書記皆汲而上之令婦人習爲大言聲使聞數百步以傳宣教令或問其故瓚曰我昔驅叛胡于塞表掃黃巾于孟津當此之時謂天下指揮可定至於今日兵革方始觀此非我所決不如休兵力耕以救凶

年兵法百樓不攻今吾諸營樓櫓千里積穀三百萬
斛食此足以待天下之變後為袁紹所敗
魏毛嘉以明帝后父封博平鄉侯嘉本與虞車工卒
暴富貴帝令朝臣會其家飲宴其容止舉動甚蚩駘
語輒自謂侯身時人以為笑位至散騎侍郎
曹爽為大將軍與鄧颺何晏等專亂朝政司馬宣王
將討之正始十年車駕朝高平陵爽兄弟皆從宣王
勒兵馬先據武庫遂出屯維水浮橋奏請廢爽等爽
得宣王奏事不通迫窘不知所為大司農桓範說爽
使車駕幸許昌招外兵爽兄弟猶豫未決會宣王使

許允陳太解語爽蔣濟亦與書達宣王之旨又使爽

所信殿中較尉尹大目謂爽唯免官而已以維水為

誓爽信之罷兵爽既罷兵曰我不失作富家翁範哭

曰曹子丹

爽父真字子丹

佳人生汝兄弟犢爾何圖今日坐

汝等族滅矣爽兄弟歸家勅維陽縣發民八百人使

尉部圍爽第四角角作高樓令人在上望視爽兄弟

舉動爽計窮愁悶持彈到後園中樓上人便唱言故

大將軍東南行爽還廳事上與兄弟共議未知宣王

意深淺作書與宣王曰賤子爽哀惶恐怖無狀招禍

分受屠滅前遣家人迎糧于今未反數日乏糧尚煩

見餉以繼旦夕宣王得書大驚卽答書曰初不知乏
糧甚懷踧踖令致米一百斛并肉脯鹽豉大豆尋送
爽兄弟不達變數卽便喜歡自謂不死

顧愷之爲桓溫司馬叅軍嘗以一厨畫糊題其前寄
桓玄皆其深所珍惜者玄乃發其厨後竊取畫而緘
閉如舊以還之給云未開愷之見封題如初但失其
畫直云妙畫通靈變化而去亦猶人之登仙了無怪
色及爲散騎嘗侍與謝瞻連省夜于月下長詠瞻每
過贊之愷之彌自力忘倦瞻將眠令人代已愷之不
覺有異遂申旦而止尤信小術以爲求之必得桓玄

嘗以一柳葉給之曰此蟬所翳葉也取以自蔽人不
見已愷之喜引葉自蔽玄就溺焉愷之信其不見已
也甚以珍之

庾條爲臨川太守條冰之弟翼之兄而條於兄弟最
凡劣故祿位不至

宋趙倫之爲領軍將軍性野拙人情世務多所不解
久居方伯頗覺富盛入爲護軍資力不稱以爲見貶
光祿大夫范泰好戲謂曰司徒公缺必用汝老奴我
不言汝資地所任要是外戚高秩次第所至耳倫之
大喜每載酒肴詣泰

劉義綦襲封營道侯凡鄙無知識每爲始興王濬兄弟所戲濬嘗謂義綦曰陸士衡詩曰營道無烈心其何意若阿父如此義綦曰下官初不識士衡何忽見若其庸塞皆然位湘州刺史

戴法興後廢帝時爲越騎較尉尋免官鄉里賜死於家法興臨死封閉庫藏使家人謹錄其鑰

王懌侍中琨之父懌不辨菽麥時以爲殷道矜之流人無肯與婚家以獠婢恭心侍之遂生琨

南齊劉道隆爲右衛將軍時謝超宗作商淑儀誅奏之大嗟賞謂謝莊曰超宗殊有鳳毛道隆在御坐出

候超宗曰聞君有異物可見乎超宗曰懸磬之室復有異物耶道隆武人無識正觸其父名曰旦侍宴至尊說君有鳳毛超宗徒跣還內道隆謂簡覓鳳毛至暗待不得乃去

熊虔初爲武陵王贊中直兵沈攸之過郢州虔於城中樓上罵辱至自發露形體穢辱之及事寧虔功居多後見朝廷貴戚說郢城事宜露如初其慙如此張敬兒爲征西將軍於襄陽城西起宅聚財貨又欲移羊叔子墮淚碑于其處立臺網紀諫曰羊太傅遺德不宜遷動敬兒曰太傅是誰我不知也後爲散騎

嘗侍不習朝儀聞當內遷乃於密室中屏人學揖讓對空中俯仰竟日妾侍竊笑及時拜開府儀同三司謂其妓曰我拜後應開黃閣因口為鼓聲又於新林慈姥廟為妾乞兒祝神自稱三公梁柳津為太子詹事雖乏風華性甚強直人或勸之聚書津曰吾嘗請道士奏章驅鬼安用此鬼名耶張仲子竟陵人孫其子與世致位給事中及與世為雍州刺史欲將往襄陽愛鄉里不肯去嘗謂與世曰我雖田舍老公樂聞鼓角汝可送一部行田時欲吹之與世素恭謹畏法譬之曰此是天子鼓角非田舍

所吹與世欲拜墓仲子謂曰汝衛從太多先人必當驚怖與世減撤而行

胡僧祐為天水天門二郡太守性好讀書不解緝綴然每在公宴必強賦詩文辭鄙野多被嘲諠僧祐怡然自若謂已實工矜伐愈甚

蕭應廬陵王之子應不慧父薨至內庫閱珍物見金鏡問左右曰此可食不答口不可應曰旣不可食並特乞汝他皆此類

何敬容為左僕射其署者敬字則大作苟小為父容字則大為父小為口陸垂戲之曰公家苟旣奇大父

亦不小敬容遂不能答嘗有客姓吉敬容問卿與郗吉遠近答曰如明公之與蕭何
後魏翟黑子封遼東公有寵於太武奉使并州受布千疋事尋發覺黑子請計於著作郎高允曰主上問我首與諱乎允曰公惟幄寵臣答詔宜實又自告忠誠罪必無慮中書侍郎崔覽公孫質等咸言首實不可測宜諱之黑子以覽等為親已而反怒允曰如君言誘我死何其不宜遂與允絕黑子以不實對竟為太武所疎終獲戮死

宋鴻貴為定州平北府參軍送戍兵於荊州坐取兵

絹四百疋兵欲告之乃斬十人又疎凡不達律令見律有梟首之罪乃生斷兵手以水澆之然後斬决尋坐伏法時人哀兵之苦笑鴻貴之愚

翻約性多造次好以榮利干謁乞丐不已多為人所笑弄坎墮於世不免饑寒

北齊庫狄干為太宰封章武郡王不知書署名為千字逆上畫之時人謂之穿鉗又武將王周者署名先為吉而後成其外二人至子孫始並知書

尉瑾為右僕射開門穢雜為世所鄙然亦折節下士意在引接名流但不之別也

孫奉爲散騎嘗侍學淺行薄邢邵嘗謂曰須更讀書
奉曰我精騎三千足敵君羸卒數萬奉少時與溫子
昇齊名嘗謂子昇卿文何如我子昇謙曰不如卿奉
要其爲誓子昇笑曰但知劣於卿便是何勞旦旦奉
愴然曰卿不爲誓事可知矣

唐韓簡爲魏博節度使封昌黎郡王而性龐質每對
文士不曉其說心嘗恥之乃召一孝廉令講論語父
講至爲政篇明日謂諸從事曰僕近知古人淳朴年
至三十方能行立外有聞者無不絕倒

高震寓爲邠寧節度觀察等使震寓本騎將性輕但

無節制之材始因隨吐突承璀東討遂累得任而又
好非斥朝列侮慢僚屬鄙詞俚語日聞於人竟不自
悟以至於卒

張仲武武宗會昌中爲幽州節度使教其民曰凡爲
牛馬羊豕之類必先擇其牝之大者則其種亦大乃
自指曰吾所以形貌大者繇母故也

趙道典爲右武侯將軍其父才居是官時癖字仍舊
不改時人以爲榮道典嘗自指其廳事曰此是趙才
將軍廳今還使趙才將軍兒坐爲朝野所笑將爲口
實

後唐盧程為莊宗太原府支使莊宗嘗于帳中召程
 草奏程曰叨忝成名不閑筆硯錄是文翰之選不及
 於程時張承業專制河東留守士人皆敬憚舊例支
 使監諸廩出納程訴于承業曰此事非僕所長請擇
 能者承業叱之曰公稱文士即合飛文染翰以濟霸
 圖嘗命草辭自陳短拙及留職務又以為辭公所能
 者何也程垂泣謝之

晉康福為秦州節度使福無軍功屬後唐明宗龍躍
 有際會之幸擢自小較暴為貴人每食非羊之全髀
 不能飲腹與士大夫交言情無所別在天水日嘗有

疾幕客謁問福擁衾而坐客有退者謂同列曰錦衾
 爛兮福聞之遽召言者怒視曰吾雖生於塞下乃唐
 人也何得以為爛奚因叱出之繇是諸客不敢措辭
 復有末客姓駱其先與後唐懿祖武皇來自金山府
 一日因公讌福謂從事輩曰駱評事官則卑門族甚
 高正沙陀也聞者竊笑焉

冊府元龜

冊府元龜

淮南李嗣京叅閱

西極文翔鳳訂正

豫章黃國琦較釋

總錄部

二百五

知舊

贈遺

不託孤

知舊

傳曰人惟求舊又曰久要不忘蓋古之君子義重雅
游或相善於膠庠或比居於邑里歲月其邁窮達以
殊而能推引其材贈問以禮患難相濟終始不渝展

總錄部

卷之五十五

其誠心敦彼雅俗傳云故舊不遺則民不偷其是之謂與

魯季友如陳塋原仲原仲季友之舊也

漢司馬相如歸成都而家貧無以自業素與臨邛令

王吉相善吉曰長卿久宦游不遂而困遂達也來過我

於是相如往舍都亭臨邛所泊都之亭臨邛令繆為恭敬繆詐

也日往朝相如相如初尚見之後稱病使從者謝吉

吉愈益謹肅臨邛多富人卓王孫篋客八百人篋謂奴

程鄭亦數百人程鄭亦人姓名言富亞王孫者也乃相謂曰今有貴

客為具召之具謂酒食之具召請也并召令令既至卓氏客以

百數至日中請司馬長卿長卿謝病不能臨臨邛令

不敢嘗食身自迎相如相如為不得已而強往示眾人以

此意一坐盡傾皆傾慕其風采也後為孝文園令

後漢朱勃字叔陽年十二能誦詩書嘗候馬援兄况

勃衣方領能矩步辭言嫺雅援裁知書見之自失况

知其意乃自酌酒慰援曰朱勃小器速成智盡此耳

卒當從汝稟學勿畏也勃未二十右扶風請試守渭

城宰及援為將軍封侯而勃位不過縣令援後雖貴

嘗以舊恩而卑侮之勃愈身自親及援遇讒唯勃能

終焉

魏孟建字公威少與諸葛亮俱游學亮後出祁山答
司馬宣王書使杜子緒宣意于公威也

杜畿為河東太守與衛固少相侮狎固嘗輕畿畿嘗
與固博而爭道畿嘗謂固曰仲堅

固字也

我今作河東

也固褰衣罵之及畿之官而固為郡功曹張時故在
京兆畿迎司隸與時會華陰時畿相見於儀嘗各持
版時嘆曰昨日功曹今為郡將軍也

杜贄舉孝廉除郎中轉補較書贄與母丘儉鄉里相
親故為詩與儉求仙人藥一九欲以感切儉求助也
儉復答詩贄竟不得遷卒于秘書

曹嘉元康中與石崇俱為國子博士嘉後為東莞太
守崇為征虜將軍監青徐軍事屯于下邳嘉以詩遺

崇

蜀關羽為盪寇將軍與魏將徐晃宿相愛羽攻曹仁
于樊曹公遣晃救曹仁羽與晃遙共語但說平生不
及軍事須臾晃下馬宣令得關雲長頭

雲長羽字

賞金千

斤羽驚怖謂晃曰大兄是何言邪晃曰此國之事耳
趙雲為牙門將軍與魏將夏侯惇戰於博望生獲夏
侯蘭蘭是雲鄉里人少小相知雲白先王活之薦蘭
明於法律以為軍正雲不用自近其慎慮類如此

劉巴字子初始曹公辟為掾使招納長沙零陵桂陽
 會先主畧有三郡不得反使遠適交阯更姓為張與
 交阯太守士燮計議不合乃繇牂牁道去為益州郡
 所拘留太守欲殺之主簿曰此非嘗人不可殺也主
 簿請自送至州見益州牧劉璋父焉昔為巴父祥所
 舉孝廉見巴驚喜每大事輒以咨訪
 楊戲出領梓潼太守入為射聲校尉篤于舊故居誠
 存厚與巴西韓儼黎韜童幼相親厚儼因疾廢頓韜
 無行見捐戲經紀振卹恩好如初

吳滕裔伯父耽父胄與揚州刺史劉繇州里通家以

世擾亂渡江依繇耽至車騎右司馬胄太帝符以賓
 禮裔至丞相

嚴峻為衛尉廣陵劉穎與峻有舊穎精學家巷大帝
 聞徵之以疾不就其弟畧為零陵太守卒官穎往赴
 喪帝知其詐病急驛收錄峻亦馳語穎使還謝帝怒
 廢峻而穎得免罪
 王導為丞相咸和中衛玠改瑩于江寧導教曰衛洗
 馬明當改瑩此君風流名士海內所瞻可脩薄祭以
 敦舊好

梁陳伯之為江州刺史伯之與豫章人鄧繕永與人

戴永忠並有舊繕經藏伯之息膺禍伯之尤德之及在州用繕為別駕永忠記室叅軍

後唐王延歷徐宋鄆青四鎮從事長興初同鄉里馮道趙鳳在相位擢拜左補闕踰年以水部員外郎知制誥就改郎中正拜中書舍人賜金紫

趙鳳初落髮為僧與遊方者雜處至太原頃之劉守奇歸莊宗周德威軍於涿州莊宗命守奇軍佐之鳳鄉人從守奇奔梁梁用守奇為博州刺史表鳳為判官

劉替初仕梁為租庸巡官莊宗入汴租庸副使孔謙

以贊鄉黨表為監鐵判官

李崧始辟鎮州范延光管記與宰臣李愚從莊宗皇子繼岌伐蜀有舊擢為拾遺俄而延光入代安重誨為樞密使奏崧以本官為本院學士

韓暉明宗天威初改秘書監俄而馮道為丞相與暉俱莊宗龍潛佐幕之舊以暉性謹厚尤左右之尋遷禮部尚書

周申師厚少為兗州牙將與王峻相善澹太祖登極師厚以峻為樞密使兼輔相每旭旦于峻馬首望塵而拜訴羈旅乞任使久之偶西涼請帥太祖詔宰臣

擬議訪諸率府率供奉官之間竟無願者峻遂以師厚奏之太祖曰西涼陷在西戎不欲強之異從人所欲峻問師厚曰爾領一節制可否師厚駭愕之亦不之信峻以其事諭之師厚欣然求往朔日制下不宣于朝遽得環衛之任俾鎮西涼錫賚繒帛馳馬旌節以遣之

張義為監察御史廣順二年十月賜緋魚笏王峻之奏也義唐三司使延朗之子也峻嘗事延朗故有是請

贈遺

周禮君有匪頒臣有好予故贈遺之義存乎典制乃有因締交之厚持出境之餼或旌其臧謀或重其高節申雅素之旨表軫卹之心是亦非主乎財蓋成於禮而已然則妄與之誠先賢所惡私受之責良吏攸記故知介潔之士亦所慎焉

吳公子札聘于鄭見子產如舊相識與之編帶子產獻紵衣焉

昭屠伯衛大夫也魯合諸侯於平丘次於衛地晉叔鮒求貨于衛淫芻蕘者欲使衛患之而致貨衛人使屠伯饋叔向羹與一篋錦曰諸侯事晉未敢携貳况衛在君之

字下屋宇之下而敢有異志芻蕘者異於他日敢請

之請止叔向受羹反錦受羹示不逆其意且非貨

韓宣子晉大夫也有環其一在鄭商宣子謁諸鄭伯

子產弗與四月鄭六卿餞宣子于郊宣子私覲於子

產以玉與馬日子命起舍夫玉是賜我玉而免吾死

也敢不藉手以拜以玉馬藉手拜謝子產

趙孟晉大夫也趙圍吳趙孟使楚隆至吳王拜稽首

曰寡人不佞不能事越以為大夫憂拜命之辱與之

一簞珠簞小筭使問趙孟問迂曰勾踐將生憂寡人寡

人死之不得矣

季康子魯大夫饋藥孔子拜而受之曰丘未達不敢

嘗未知其故故不敢嘗禮也

公西赤字子華孔子弟子也子華使于齊冉子為其

母請粟子曰與之釜六斗四升曰釜請益曰與之庾十六斗曰庾

冉子與之粟五秉十六斛曰秉五秉合為八十斛子曰赤之適齊也

乘肥馬衣輕裘吾聞之也君子周急不繼富非冉有與之太多

多

原思為之宰弟子原憲思字也孔子為魯司寇以原憲為家邑宰與之粟九百

辭九百九百斗子曰毋祿法所得當受不讓以與爾隣里鄉黨

乎五家為隣二十五家為里萬二千五百家為鄉五百家為黨

孔子之衛遇舊館人之喪

前日君所使舍已

入而哭之哀出

使子貢說驂而賻之

賻助喪用也駢馬日驂

子貢曰于門人之

喪未有所說驂驂說於舊館無乃已重乎

言說驂太重比于門

人恩為偏頗

夫子曰予鄉者入而哭之遇于一哀而出涕

遇見也舊館人恩雖輕我入哭見主人為我盡一哀是以厚恩待我我為出涕恩重宜有施惠

予惡

夫涕之無從也小子行之

客行無他物可以易之者使遂以往

孟子名軻鄒人也弟子陳臻問曰前日于齊王餽兼

金一百而不受于宋餽七十鎰而受于薛餽五十鎰

而受前日之不受是則今日之受非也今日之受是

則前日之不受非也夫子必居一於此矣

兼金好金也其價倍

於惡者故謂之兼金百鎰也古者以一鎰為一金鎰二十兩也孟子曰皆是也當在

宋也予將有遠行行者必以贖辭曰餽贖予何為不

受 贖送行者贈賄之禮也時人為之贖也當在薛也予有戒心辭曰聞

戒故為兵餽之予何為不受 戒有備戒不虞之心也時有惡人欲害孟子

子戒備薛君聞戒此金可嚮以作兵備故餽之我何為不受也若于齊則未有處也

無處而餽之是貨之也焉有君子而可以貨取乎

漢陸賈為大中大夫呂太后用事以病免為丞相陳

平畫謀交驩太尉周勃平乃以奴婢百人車馬五十

乘錢五百萬遺賈為食飲費

司馬相如與妻文君歸成都文君當壚

賣酒之處壘土為壚以居

酒瓮四邊隆起其一面高形如銀壚故名壚耳

雜作卓王孫

文君父也

恥之為杜

門不出

杜塞也

昆弟諸公更謂王孫曰

更互也

有一男兩

女所不足者非財也

言不患少財也

今文君既失身於司馬

長卿長卿故倦游

倦疲也言疲厭游學博物多能也

雖貧其人材足

依也且又令客奈何相辱如此

言縣令之客不可以辱也

卓王孫

不得已

已止也

分與文君僮百人錢百萬及其嫁時衣

被財物文君乃與相如歸成都買田宅為富人居後

至孝文園令

李陵為騎都尉戰敗降匈奴見蘇武陵惡自賜武

謂若

示已於匈奴中富饒以考武

使其妻賜武牛羊數十頭

後漢杜林字伯山扶風人徵為侍御史與馬援同鄉

里素相親厚援從南方還時林馬適死援令子持馬

一疋遺林日朋友有車馬之饋可且以備乏林受之

居數月林遣子奉書曰將軍內施九族外有賓客墜

恩者多林父子兩人食列鄉祿嘗有盈今送錢五萬

援受之謂子曰人當以此為法是杜伯山所以勝我

也

晉孔沉字德度累辟不就從兄坦以裘遺之辭不受

坦曰晏平仲儉祀其先人豚肩不掩豆猶狐裘數十

年卿復何辭於是受而服之

宋褚叔度爲廣州刺史以贖貨免還至都凡諸舊友有一面之款無不厚加贈遺

王弘之徵爲通直散騎嘗侍不就從兄敬弘嘗解貂裘與之卽着以採藥

許瑤之居在永興罷建安郡丞還家以綿一斤遺郭原平原平不受送而復反者前後數十瑤之乃自往曰今歲過寒而建安縣好以此奉尊上耳原平乃拜而受之

南齊袁彖爲安西長史庾易有高尚之節永明三年詔徵太子舍人不就以文義自樂彖欽其風通書致

遺易以連理杭竹翹書格報之

張融字思光吳郡吳人也年弱冠道士同郡陸脩靜以白鷺羽塵尾扇遺融曰此旣異物以奉異人

後魏李元忠除驃騎大將軍儀同三司曾貢文襄玉蒲桃一盤文襄報以百縑其見賞重如此

爾朱榮父新興高祖時爲右將軍每入朝諸王公朝貴競以珍玩遺之新興亦報以名馬

唐陸贄爲華州鄭縣尉罷秩東歸省母路經壽州刺史張鎰有時名贄往謁之及辭遺贄錢百萬曰願備太夫人一日之膳贄不納唯受新茶一甌而已曰敢

不承君厚意及為中書舍人翰林學士母卒侍喪於河南豐縣佛寺四方以賻贈為詞厚致金帛贊絲毫無受惟與劔南節度使韋臯布衣友善臯以事奏聞每有所致輒稱詔以授之
李愬西平王晟之子也為魏博節度使穆宗長慶元年幽鎮復亂愬以玉帶寶劔與深州刺史牛元翼遣使謂之曰吾先人嘗以此劔立大勳吾又以此劔平蔡寇今鎮人叛逆公宜用此剪之元翼承命感激乃以劔及帶令於軍中報之曰願以眾從竭其死力

託孤

夫以篤信行義顧惟君子託孤寄命亦在知人傾腹心於生平之日奉然諾於懸邈之期身魂有主遺育不孤豈非信乎可謂仁矣求諸千載其人蓋稀風烈所存瞻詠何已

申舟楚大夫也楚子使聘於齊楚子曰無假道于宋

申舟無畏亦使公子馮聘於晉不假道於鄭申舟以孟諸

之役惡宋文十年楚子田孟諸無畏快宋公僕曰鄭昭宋昭至也晉

使不害我則必死王曰殺女我伐之見犀而行犀申舟子

以子託王示必死及宋宋人止之華元曰過我而不假道鄙

我也鄙我亡也以我北其邊鄙是與亡國同殺其使者必伐我伐

我亦亡也亡一也乃殺之

樂祁宋大夫也言於景公曰諸侯唯我事晉今使不

往晉其憾矣樂祁告其宰臣寅

以與公言告之

陳寅曰必使

子往他日公謂樂祁曰唯寡人說子之言子必往陳

寅日子立後而行吾室亦不亡

寅知晉政多門往必去難故使樂祁立後

而唯君亦以我為知難而行也見溷而行

溷樂祁子也見於君

立以為後

趙朔晉大夫盾之子也司寇屠岸賈將作亂誅靈公

之賊盾已死矣欲誅其子朔韓厥止賈賈不聽厥告

朔令亡朔日子必能不絕趙祀死不恨矣韓厥許之

及賈誅朔程嬰公孫杵臼之藏其孤趙武也厥知之

晉公病卜大業之不遂多為崇韓厥稱成季之功今

後無祀以感景公景公問曰尚有世乎厥於是言趙

武而復與之田邑

漢趙貢為琅邪太守行縣見不其丞薛宣甚說其能

從宣歷行屬縣還至府令妻子與相見戒曰贛君

贛君

薛宣字

至丞相我兩子亦中丞相史宣為丞相除贛君

兩子為史

後漢張堪素有名稱嘗於太學見朱暉甚重之接以

友道乃把臂曰欲以妻子相託朱生暉以堪先達舉

手未敢對自後不復見堪堪後爲漁陽太守卒暉聞其妻子貧困乃自往候視厚賑贍之暉後至尚書令魏劬越字異度後漢時爲章陵太守封樊亭侯獻帝建安十九年卒臨終與太祖書託以門戶太祖報書曰死者及生生者不愧孤少所舉行之多矣魂而有靈亦將聞孤此言也

蜀馬超爲左將軍臨歿上疏曰臣門宗三百餘口爲孟德所誅盡惟有從弟岱當爲微宗血食之繼深託陛下餘無復言

晉王恭爲平北將軍兵敗初見執遇故吏戴耆之爲

始孰今恭私告之曰我有庶兒未舉在乳母家鄉爲我送寄桓南郡耆之遂送之於夏口桓玄撫養之爲立喪弔祭焉

南涼秃髮儁檀僭號涼王後秦姚興涼州刺史王尚遣王簿宗敞來聘敞父燮呂光時自河湟太守入爲尚書郎見儁檀于廣武執其手曰君神爽宏放逸氣凌雲命世之傑也必當克清世難恨吾年老不及見耳以敞兄弟託君至是儁檀謂敞曰孤以嘗才謬爲尊先君所見稱每自恐有累大人冰鏡之明乃忝家業竊有懷君子詩云中心藏之何日忘之不圖今日

得見卿也敞曰大王仁侔魏祖存念先人雖朱暉賈張璠之孤叔向撫汝齊之子無以加也酒酣語及平生傳擅曰卿魯子敬之儔恨不與卿共成大業耳陳姚察爲吏部尚書察與謝貞友善及貞病篤察往省之間以後事貞曰孤釁禍集將隨灰壤族子覲等粗自成立已有疏付之固不足仰塵厚德卽日迷喘時不可移便爲永訣弱兒年甫六歲名靖字依仁情所不能忘敢以爲託耳是夜卒勅贈米一百斛布三十疋後主問察曰謝貞有何親屬察因啓曰貞有一子年六歲卽有勅長給衣糧

唐孫思邈見太子詹事盧齊卿於童幼齊卿請問人倫之事思邈曰汝後五十年位登方伯吾孫當爲屬吏可自保也後齊卿爲徐州刺史思邈孫溥果爲徐州蕭縣丞

史可自野也齊齊鞭為翁世陳史思遠新專果為翁
會六事思遠曰女翁正十年立登丈前晉新當為
曹絲思遠貝太子曹事盡齊鞭杖童終齊鞭請問人

佩蕭緹丞

册府元龜

淮南李嗣京參閱

西極文翔鳳訂正

豫章黃國琦較釋

外臣部

總序

夫東方曰夷被髮而文身南方曰蠻雕題而交趾西
方曰戎被髮而衣皮北方曰狄衣羽毛而穴居古者
制夷蠻為要服制戎翟為荒服要服者貢荒服者王
蓋要荒皆王者之外二臣也其在上古簡册未造四

夷之事湮滅罔紀至於陶唐有山戎獫狁薰鬻之狄
 虞舜始請流共工于幽陵以變北狄放讎兜于崇山
 以變南蠻遷三苗于三危以變西戎殛鯀于羽山以
 變東夷命臯陶爲士以掌猾夏之禁及禹定九州舜
 乃南撫交趾西放西戎折枝渠搜氏羗北發山戎息
 慎東長鳥夷夏太康失德夷人始畔是時夷有九種
后泄二十一年命大夷白夷赤夷玄夷風夷陽夷后
相一年征黃夷七年千夷來賓少康即位方夷來賓
也后相即位乃征吠夷七年然後賓少康已後夷人
 世服王化賓于王門獻其樂舞帝桀不道諸侯內侮
 吠夷入居邠岐之間商湯革命伐而定之至於仲丁

藍夷作寇武丁即位征西戎鬼方而克之武乙衰弊
 東夷浸盛分遷淮岱漸居中土犬戎寇邊周古公亶
 父踰梁山而避於岐洎于王季遂伐西落鬼戎及姑
 呼翳之戎皆克之文王爲西伯又伐吠戎至武王伐
 紂羗夷會于牧野肅慎來獻定都鄴鎬乃放逐戎夷
 涇洛之北後周公征管蔡遂定東夷洎穆王伐吠戎
 得白狼白鹿以歸自是荒服不至又云穆王西征吠
戎于太原是時周道衰弱徐夷僭號王命楚武王克之時
 楚又克荆蠻而服屬之懿王之時獫狁內侵厲王不
 道淮夷入寇蠻荆爲讎宣王中興乃命將帥征蠻荆

平淮夷伐獫狁城朔方而四夷賓焉幽王之亂畎戎復入居涇渭之間秦襄公伐平之平王東遷四夷交侵中國齊桓公攘之後山戎伐燕齊桓公走之襄王時戎翟犯維邑東至衛境侵盜尤多晉文公修霸業乃興師伐之攘戎秋居于西河周雒之間號曰赤翟白翟是時秦晉自瓜州遷陸渾戎于伊川遷九姓之戎于渭汭東及輜轅曰陰戎其後隴以西有緜諸畎戎狄獯却冀之戎岐梁涇漆之北有義渠大荔烏氏朐衍之戎渭南有驪戎伊雒間有揚拒泉皐之戎潁首以西有蠻氏之戎晉北有林胡樓煩之戎燕北有

東胡山戎而淮夷越遷邠邠陵暴諸夏後晉悼公使魏絳和戎翟戎翟朝晉陰戎之種遂以滋廣與晉成周後陸渾戎叛晉晉荀吳滅之楚靈王會申淮夷來盟自後楚遂執蠻氏盡囚之秦厲公滅大荔取其地楚悼王并蠻越有洞庭蒼梧之地趙襄子踰句注破戎翟以臨胡貉韓魏稍并伊雒陰戎滅之其遺脫者皆西走踰汧隴自是中國無戎寇惟餘義渠種焉後最爲強盛屢爲秦患秦昭王起兵滅之以其地置隴西北地上郡又伐楚掠取蠻夷爲黔中郡築長城以距胡趙武靈王胡服習騎射破林胡樓煩自代並陰

山下至高關爲塞置雲中雁門代郡其後燕有賢將秦開襲破東胡却地千里燕遂築長城自造陽至襄平以距胡秦始皇滅六國驅羗戎出塞北却匈奴築長城渡河以陰山爲塞散淮夷爲民戶畧定揚粵破西南夷通五尺道盡置吏焉洎諸侯叛秦中國擾亂匈奴得寬復稍渡河南與中國界於故塞楚將軍莊躋王滇龍川令趙佗王南粵燕人滿王朝鮮漢初匈奴冒頓強盛悉復收秦所奪地遂侵燕代時漢方與項羽相距未暇禦邊乃棄西南夷而關蜀故微約朝鮮爲外臣保塞漢平定天下匈奴復寇馬邑踰句注

攻太原至晉陽漢高帝親將兵往擊之遂約和親是後數背約盟侵盜代地孝惠高后時匈奴南粵數爲邊患文帝時匈奴或入居河南地爲寇漢兵擊走之復入朝那蕭關至彭陽漢遂發兵出塞卽還不能有所殺匈奴日以驕歲入邊殺畧人民雲中遼東最盛而陸賈說南粵奉藩稱臣景帝時乃與匈奴通關市給遣之時時小入盜邊無大寇西羗研種亦徙徙于狄道安固武帝卽位初邊陲無警洎馬邑失策匈奴乃歲入盜邊於是天子尚威武勤遠畧命衛霍將兵深入大敗其衆匈奴遠遁幕南無王庭是時南誅兩

越東拔濊貊朝鮮以爲郡通西南夷犍牂牁夜郎等爲置吏通西域三十六國逐西羌渡河湟以其地置酒泉等郡隔絕胡羌相通之路又以翁主妻烏孫以分匈奴西方之援國置護羌校尉以護先零等羌洎貳師不利漢始不復出兵昭帝時匈奴犯塞後漢兵破烏桓匈奴震恐遂不能出兵而西南夷氏人數叛皆破平之宣帝卽位發五將軍兵十餘萬出塞討匈奴又護發烏孫兵從西方入以助漢兵匈奴逃遁死傷不可勝數自是哀耗日削迨五單于爭立君長多降漢甘露三年呼韓邪單于遂入朝于甘泉宮始置都

護督察西域諸國而先零又寇金城皆討降之置金城屬國以處之自後賓服元帝時竟寧河平中匈奴單于再入朝哀帝卽位烏孫大昆彌與單于共入朝時西域分爲五十五國皆通貢獻王莽之亂蠻夷愁擾匈奴復入塞貊人寇邊粵雋蠻夷自立爲王西域怨叛與中國絕漢後建武初東夷高句驪濊貊倭韓萬里朝獻西域遣使內屬光武不許之而武陵蠻夷特盛侵寇州郡匈奴來獻復與烏桓寇鈔不絕二十三年南北二單于立南單于款塞稱臣願爲蕃蔽漢嘉其意割并州北界以安之自是二虜相侵漢地晏

然矣二十五年烏桓向化鮮卑始通驛使群蠻乃平
 哀牢夷內屬然自後群蠻西南夷種滋多叛服不一
 明帝永平初鮮卑歸附北匈奴復入寇盜又脅西域
 諸國寇河西漢兵遂取伊吾盧地置宜禾都尉復通
 西域于寘諸國並遣子入侍西域自絕六十五載乃
 復通焉章帝建初元年武陵澧中蠻畔擊降之元和
 初北匈奴衰耗遠引而去西域叛漢乃迎還戊己較
 尉留軍司馬班超於于寘綏集諸國和帝永元元年
 漢兵大破北單于而鮮卑轉據其地得匈奴遺種其
 族漸盛尤為邊患二年班超遂定西域至于海瀕通

驛四萬里安帝永初元年西域背叛攻圍都護遂棄
 西域三年南單于叛烏桓鮮卑群蠻為寇諸羌競起
 為患尤橫自後或降或畔延光中復以班勇為西域
 長史通西域自建武至是後西域三絕三通順帝永
 建二年勇復降焉者等十七國而烏孫葱嶺已西遂
 絕桓帝永壽元年南匈奴復畔與烏桓鮮卑寇邊擊
 降之永興已後西域浸以疎漫矣靈帝末天下大亂
 單于統數千騎與白波賊合寇河內鮮卑烏桓為寇
 尤甚魏太祖乃分塞下匈奴為五部徙居太原諸縣
 其西域大國朝貢畧如漢氏故事時烏桓鮮卑強盛

後太祖乃破烏桓徙其餘種於中國明帝青龍中鮮卑種落離散邊陲差安雖時有寇鈔不能復相役屬矣景初中誅公孫淵始通東夷收樂浪帶方之郡海表謐然時西南邛笮則界于蜀南蠻交阯則界于吳皆時有叛服晉武帝受禪四夷入貢者二十三國塞外匈奴二萬餘落向化使與晉人雜居河西惠帝之後人為中國之患自是羗虜戎羯盜居內地建國僭號凡十有六國而南徼蠻夷寇鈔不絕宋齊至於梁陳與後魏北齊分據中夏蠻徼海夷則朝貢于南羗胡夷狄則賓屬於北種族同邑之號日以蕃滋服叛

朝貢之事不可悉紀而漠北惟蠕蠕最為強盛後周突厥復強與吐谷渾數為邊患西域時通使聘隋混一南北與吐谷渾和親朝貢歲至時突厥二可汗爭立隋討達頭可汗而立啓民可汗因之和親北鄙以寧煬帝好兵勤遠西域至者三十餘國取吐渾地為郡縣高昌王突厥可汗西突厥處羅可汗皆詣闕貢獻高麗再征而服大業之末中國叛亂華人奔突厥者甚眾其族遂熾而西突厥亦跨有西域諸國唐高祖起兵突厥遣兵助平京城武德初突厥來貢未幾入寇并汾至於渭濱太宗與之盟而退時薛延陀漸

雄于漠北貞觀中西突厥數易主西域諸國多叛之
而內屬時又党項請降太宗命置岷奉巖遠四州以
處之俄而吐蕃連年同破吐谷渾党項白蘭諸羌率
衆入寇松州遂約和親自是賓服未幾迴紇破薛延
隨併其衆五年唐兵破突厥擒頡利可汗降者僅十
萬置定襄雲中二都督府以統其部衆時塞北惟迴
紇爲雄太宗又置燕然等六府七州以統之九年討
降吐谷渾十三年破高昌以其地置西州及安西都
護府十四年虜焉耆王二十一年擒龜茲王西域震
服高宗永徽元年擒車鼻可汗而突厥盡爲封疆之

臣置單于瀚海二都護府以統之二年擒西突厥賀
魯分其種落置崑陵濛池二都護府以領之自是西
域諸國皆通於中國六年迴紇遣兵助討高麗龍朔
二年吐蕃滅吐谷渾咸亨已後吐蕃復畔寇邊掠有
諸羌之地西陷四鎮地方萬餘里調露元年突厥復
畔則天長壽元年始大破吐蕃收四鎮之地乃於龜
茲復置安西都護府以鎮之聖曆中突厥寇邊爲害
尤極久視元年又大破吐蕃吐蕃請和中宗初突厥
愈強盛寇邊而吐蕃貢獻請和親睿宗卽位乃以河
西九曲地賜吐蕃以其地肥饒堪頓兵於是復畔明

皇初突厥萬餘帳來降屢遣使朝獻吐蕃數寇邊境陷瓜州廻紇斷安西路開元十六年大破吐蕃二十四年又掩吐蕃不備而被之自是朝貢不至數爲寇盜天寶末盡徵河隴朔方之兵入靖國難於是邠州之地盡爲吐蕃所據肅宗在靈武與廻紇和親廻紇遣兵助國討逆由是朝貢不絕而劍南西川諸州陷於吐蕃代宗卽位復徵廻紇兵討史朝義賊平令還廣德中吐蕃犯上都永泰元年吐蕃廻紇吐谷渾党項入寇王畿廻紇復降請擊吐蕃破之自是吐蕃屢寇邊境雖頻破之而其勢浸盛十年廻紇寇太原德

宗卽位與廻紇和親歸吐蕃俘虜置和蕃使與之盟誓以紓邊難興元中吐蕃復寇陷鹽夏等州貞元三年又劫平涼之盟自是吐蕃侵軼寇掠尤甚邊無寧日五年以後漸爲邊將所破然猶陷北庭麟州順宗以後吐蕃請和至憲宗元和十三年復擾邊境穆宗卽位與廻紇和親吐蕃復請盟於京城之西是後朝貢繼至武宗時廻紇黠戛斯犯東陁巴北宣宗大中初廻紇破弱遂轉徙於磧西吐蕃宰相尚恐熱以秦源安樂等州并石門等七關歛塞僖宗光啓中契丹王習爾稍強盛時中原多故習爾遂役屬達韃奚室

韋等諸部入寇其後爲幽州劉守光所破十年不敢犯塞昭宗天祐四年寇雲中後唐武皇帝與之連和又吐渾數叛旋亦歸服達靺亦依於武皇時中原懼亂燕人多人於虜天祐末契丹阿保機遂建大號署百官爲城郭梁祖建號契丹遣使求封冊梁祖不許而其衆滋盛後唐莊宗時匈奴數爲邊患吐渾微弱聚居蔚州界皆授中國官爵河西党項突厥吐蕃朝貢不絕明宗卽位遣使修好於契丹時虜主德光始建年紀未幾復寇北鄙爲邊兵所破數年不敢窺邊洎晉祖求援於契丹遂割幽朔雲應等州以賂之自

是吐渾遂屬於契丹終高祖世畧無釁隙開運哀啟遂陷京闕漢高祖初屢誅吐渾酋長其種遂衰契丹入寇邢州周太祖時契丹遣使貢獻未幾其國亂久絕南牧之意太祖又自涇州安國鉅至西涼府沿路三處置州以吐蕃首領爲刺史以總之世宗顯德中親征關南復瀛莫雄霸等州留兵以戍守自是河朔無寇患然自唐武德後至五代侵犯邊境役屬諸蕃者惟突厥吐蕃等數族爾自餘蠻夷皆不能爲邊患悉朝貢不絕若夫種類之起國邑之建風土之異職位之別承襲之次象譯之等盛衰叛服之狀交侵仇

怨之迹至於款塞內附遣使入貢交通好問臨蒞盟
 載修建警備求請饗給助國討叛納質請朝遂和親
 之榮收互市之利膺封拜之典承隆寵之數以至材
 畧形貌德行伎藝及暴慢苛忍之性怨望姦偽之事
 咸列於逐門今但敘其歷代大畧以冠於篇云凡外
 臣部三十四門

種族

夫夷狄者居中國之外稟一氣而生種別域殊未始
 滅絕天之覆露必將有以自唐虞而下見於書傳兩
 漢所紀最爲詳悉然弱則卑伏而內附強則桀驁而

難制遷徙鳥舉居無城郭之處蕃滋星散布諸虛曠
 之野迭衰迭盛不可得而去者蓋所以乖隔魑魅扞
 蔽諸夏之爲也是以古之聖人務於含養俾全性命
 羈縻驅逐勿使侵擾而已矧其保姓受氏分疆畫野
 亦有神明之遠裔不專主於怪誕參考類次披文而
 可見焉

東方夷有九種曰畎夷于夷方夷黃夷白夷赤夷玄
 夷風夷陽夷故孔子欲居九夷也

朝鮮衛王滿故燕人自始全燕時嘗畧屬直番番音普寒
切一作莫遼東有番汗漢興屬燕燕王盧綰反入匈
燕戰國時畧得比也

奴滿亡命聚黨千餘人椎結讀曰槌髻蠻夷服而東走出

寒沮水稍役屬直番沮水在樂浪縣音普蓋切朝鮮蠻夷及故燕

齊亡存者王之燕齊之人亡居此地及直番朝鮮蠻夷皆屬滿也都王險地名

臣欽若等按後漢書濊及沃瓊句驪本皆朝鮮之地以渠帥為侯王元無族

夫餘國本濊地也初北夷索離國王出行索或作索音度雜切

其侍兒於後倭身倭人鳴切王還欲殺之侍兒曰前見天

上有氣大如雞子來降我因以有身王囚之後遂生

男王令置于豕牢豕以口氣嘘之不死復置于馬

蘭蘭即馬欄也馬亦如之王以為神乃聽母收養名曰東明

東明長而善射王忌其猛復欲殺之東明奔走南至

掩淲水今高麗中有善期水疑此水是以弓擊水魚鱉皆聚浮水上

東明乘之得度因至夫餘而王之焉

高句驪亦作麗音離東夷相傳以為夫餘別種凡有五族

有消奴部一作涓奴絕奴部順奴部灌奴部桂奴部高驪五部

一曰內部一名黃部即桂婁部也二曰比部一名後部即絕奴部也三日東部一名左部即順奴部也四

曰南部一名前部即灌奴部也五一說夫餘王嘗得

河伯女因閉於室內為日所照引身避之日影又逐

既而有孕生一卵大如五升夫餘王棄之與犬犬不

食與豕豕不食棄於路牛馬避之棄於野眾鳥以毛

茹之王剖之不能破遂還其母母以物裹置煖處有

一男破而出及長字之曰朱蒙朱蒙善射夫餘之臣謀殺之乃東走北至紇升骨城遂居焉號曰高句驪以高為氏

木貊句驪別種依小水為居因名

百濟本夫餘王之後有仇台者復為高麗所破以百家濟海因號百濟

新羅本辰韓種也其國在高麗東南居漢時樂浪之地或稱斯羅其王本百濟人自海逃入新羅遂王其

國一說本弁韓之苗裔也

濊國南與高句麗接者舊自謂與句麗同種馬韓古

之辰國也韓有三種馬韓最大共立其種為辰

辰韓在馬韓之東其耆老自言秦之亡人避苦役適

韓國馬韓割東界地與之其名國為邦號為弧賊為

寇行酒為行觴相呼為徒有似秦語故或名之為秦

韓

倭人在帶方東南大海之中自謂太伯之後昔夏少

康之子封於會稽斷髮文身以避蛟龍之害今倭人

好沈沒捕魚蛤文身亦以厭大魚水禽後為女王國

夷洲及澶洲傳言秦始皇遣方士徐福將童男女數

千人入海求蓬萊神仙不得徐福畏誅不敢還遂止

此洲世世相承有數萬家人民

挹婁肅慎之後裔也其國在不咸山北在夫餘東北千有餘里

日本國者倭國之別種也以其國在日邊故以日本為名

南越王尉佗者真定人姓趙氏秦時為南海龍川令一世時南海尉任囂死佗行南海尉事秦滅佗自立為南海武王

閩越王無諸

東越之別種

及越東海王搖者其先皆越王

句踐之後也姓騶氏

騶一作駱

秦已并天下皆廢為君長

以其地為閩中都諸侯叛秦無諸搖率越歸鄱陽令

吳芮所謂鄒君者也漢五年復立無諸為閩越王王

閩中故地都東治孝惠三年舉高帝時越功曰閩君

搖功多乃立搖為東海主

在吳郡東南海濱

都東甌

今之水寧世

俗號為東甌王

林邑國本漢時象林縣後漢末縣功曹姓區有子曰

連殺令自立為王子孫相承其後王無嗣外孫范熊

代立

丹丹國隋時聞焉在多羅磨羅國西北振州東南王

姓刹利名尸陵伽

扶南國其王本是女子字葉柳時有外國人混潰者
 先事神夢神賜之弓又教載舶入海混潰且詣神祠
 得弓遂隨佑人汎海至扶南外邑葉柳率眾禦之混
 潰舉弓葉柳懼遂降之於是混潰納以為妻而據其
 國後裔應徵子孫不紹其將范尋後世王扶南矣

真獵國

一云直獵

隋時通焉在林邑西北本扶南之屬

多靡長國唐顯慶中遣使朝貢其使云某王先祖骨
 利龍之子也骨利嘗得大鳥卵剖之得一女子容色
 姝妙因以為妻今王尸羅劬備即其後也

赤土國扶南之別種也其王姓瞿曇氏名富利多塞

不知有國近遠稱其父釋王位出家為道傳位於富
 利多塞也

宋江國其王姓刹氏名質多斯那自其祖漸已強盛
 至質多斯那遂兼扶南而有之

長沙武陵蠻者槃瓠之後也始高辛氏有犬戎之寇
 帝患其侵暴而征伐不尅乃訪募天下有能得犬戎

之將吳將軍頭者購黃金千鎰邑萬家又妻以少女

時帝有畜狗其毛五采名曰槃瓠

魏畧曰高辛氏有老婦居王室得耳

疾挑之乃得物大如繭婦人盛瓠中覆之

以槃瓠俄頃化為犬其文五色因名曰槃瓠

下令之後槃瓠逐啣人頭造闕下群臣怪而矚之乃吳將軍首

也朕候帝大喜而計槃瓠不可妻之以女又無封爵

之道議欲有報而未知所宜女聞之以為帝皇下令

不可違信因請行帝不得已乃以女配槃瓠槃瓠得

女負而走入南山之上石壁室中所處險絕人跡不

至今辰州盧溪縣西有武山黃閣武陵記曰山高可

萬仞山半有槃瓠石室可容數萬人中有石牀槃

瓠行跡今案山窟前有石半石獸古跡奇異尤多望

石窟大如三間屋遙見一石仍似狗形蠻俗相傳云

是槃瓠於是女解去衣裳為僕鑿之結著獨力之衣

僕鑿獨力皆未詳流俗本或有改鑿字為望者妄穿鑿者也帝悲思之遣使尋求

輒遇風雨震晦使者不得進經三年生子一十二人

六男六女槃瓠死後因自相夫妻織績木皮染以草

實好五色衣服製裁皆有尾形于寶晉紀曰武陵長

後也雜處五溪之內槃瓠憑山阻險每每嘗為害

雜魚肉叩槽而號以祭槃瓠俗稱赤體橫裙即其子

孫其母後歸以狀白帝於是使迎致諸子衣裳班斲

語言休離休離蠻夷好入山壑不樂平曠帝順其意

賜以名山廣澤其後滋蔓號曰蠻夷外癡內黠安土

重舊以先父有功母帝之女田作賈販無關梁符傳

租稅之賦優寵之故蠲其賦役也荆州記曰沅陵縣

居酉口有上就武陽二鄉惟北是槃瓠子

孫狗種也二鄉有邑君長皆賜印綬冠用獺皮名渠

率日精夫相呼為媿徒說文曰媿女人自稱媿我也

音烏黨切此以上並見風俗通其後號荆雍州蠻槃之後也分建種落布在諸郡

縣荊州置南蠻雍州置寧蠻較尉以領之

西南夷夜郎者初有女子浣於遯水有三節大竹流

入足間聞其中有號聲剖竹視之得一男子歸而養

之及長有武才自立為夜郎侯以竹為姓見華陽武

帝元鼎六年平南夷為牂牁郡夜郎侯迎降天子賜

其王印綬後遂殺之夷獠咸以竹王非血氣所生甚

重之求為立後牂牁太守吳霸以聞天子乃封其三

子為侯死配食其父今夜郎縣有竹王三郎神是也

地里志曰夜郎縣有遯水東至廣鬱華陽國志云遯

水通鬱林有三郎祠皆有靈享又云竹王所指破竹

林今王祠成竹是也王嘗從人止大石上命竹羹

從者自無水王以劍擊石出水今竹王水是也

滇王者滇音顛地有莊躋之後也始楚威王時使畧

巴邑黔中以西黔中即今黔州是躋楚莊王苗裔躋

至滇池三百里旁平地肥饒數千里池旁以兵威定

屬楚欲歸報會秦擊奪楚巴黔中郡道塞不通因乃

以其衆王滇變服從其俗以長之為其師

衰牢夷者其先有婦人名沙一居于牢山嘗捕魚水

中觸沈木若有感因懷姙十月產子男十人後沈木

化為龍出水上少頃忽聞龍語曰若為我生子今悉

何在九子見龍驚走獨小子不能去背龍而坐龍因

舐之其母鳥語謂背為九謂坐為隆因各子曰九龍

及後長大諸兄以九隆能為父所砥而黠遂共推以
為王後牢山下有一夫一婦復生十女子九隆兄弟

娶以為妻後漸相滋長種人皆刻畫其身象龍衣文

皆著尾自此以上並見風俗通也九隆死世世相繼哀牢傳曰九隆代代相傳

各號不可得而數至於禁高乃可記名禁高死子吸

代吸死子建非代建非死子衰牢代衰牢死子桑蕪

子柳貌代柳貌死子扈桑代乃分置小王往往邑居

散在谿谷

冉駹夷者漢武元鼎六年以為文山郡其山有六夷
七羗九氏各有部落

東謝蠻者在黔安之東南蠻之別種也

松外蠻在西洱河其部落大者五六百戶小者一二

百戶無大君皆不相統有數十姓以楊李趙董之家

各擅一屬自云其先本漢人自夜郎滇池以西皆云

莊驕之餘種也

巴郡南郡蠻本有五姓巴氏樊氏臆氏音審相氏鄭氏

皆出於武落鍾離山世本日廩君之先故出証誕也其山有赤黑二

穴巴氏之子生於赤穴四姓之子生於黑穴未有君

君俱事鬼神乃共擲劍於石穴約能中者奉以為君

巴氏子務相乃獨中之眾皆歎又令各乘土船約能

浮者當以為君餘姓悉沈惟務相獨浮因共立之是

為廩君乃乘土船從夷水至鹽陽

荆州圖曰割夷縣有溫泉古老相傳

北泉元出鹽於今水有鹽氣縣西一獨山有石穴有二大石並立穴中相去可一丈俗名為陰陽石陰石

常濕陽石常燥盛弘之荆州記曰昔廩君浮夷射鹽神于陽石之土案今施州清江縣水一名鹽水源出

清江縣西都亭山水經云夷水巴郡魚復縣注云水色清炤十丈沙石蜀人見澄清因各清江也

水有女神謂廩君曰此地廣大魚鹽所出願留共居

廩君不許鹽神暮輒來取宿旦化為虫與諸虫群飛

掩蔽日光天地晦冥積十餘日廩君思其便因射殺

之天日開明世本日廩君使人操青縷以遺鹽神曰

神受此而嬰之廩君仰之陽石土應青縷而射之中鹽神死天乃大開也

廩君於是君乎夷城四姓皆臣之廩君死魂魄世為白虎巴氏以處

飲人血遂以人祠焉及秦惠王并巴中以巴氏為

夷君長世尚秦女其民爵土不更有罪得以爵除其

君長歲出賦二千一十六錢三歲一出義賦千八百

錢其民戶出幪布八丈二尺雞羽三十緞說文幪南蠻夷布也

音公亞切毛詩四緞既均儀禮緞矢一乘鄭玄曰緞猶猴也侯物射之也三十緞一百四十九俗本幪作

蒙錄作錄漢興南郡太守靳彊請一依秦時故事至並誤也

建武二十三年南郡涪山蠻雷遷等始反叛涪音寇

掠百姓遣武威將軍劉尚將萬餘人討破之徙其種

人七千餘口置江夏界中今沔中蠻是也

焦僥國後漢時通焉自言我海西人海西即大秦也

獠者蓋南之別種也自漢中達邛笮洲洞之間所在皆有種其多散居山谷中不辨姓氏雲南本鳥蠻之別種

蒙氏蠻謂王為詔自言哀牢之後代居蒙舍洲為渠帥在漢永昌故郡東姚州之西

哥羅國漢時閩焉在槃槃東南亦有哥羅富沙羅國云其王姓天梨天鉢羅

附國者蜀郡西北二千餘里即漢之南夷也有嘉良夷即其東都所居種姓自相率領土俗與附國同

西爨南寧之渠帥也其王自云本河東安邑人七世

祖仕晉為南寧太守屬中國亂遂王蠻夷梁元帝時南寧州刺史徐文盛徵詣荆州有爨瓚者遂據南寧之地

白馬蜀之西并駝以東君長以十數白馬最大皆民類也

東女國西羗之別種以西海中復有女國故稱東女焉

西域大月氏本行國也居燉煌祁連間匈奴冒頓單于攻破月氏月氏老上單于殺月氏月氏乃遠去過大隴西擊大夏而臣之其餘小眾不能去者保南山

羗號小月氏初月氏為匈奴所滅分其國為體密雙
靡貴霜盼頓都密凡五部翎侯

一云小月氏國都富樓沙城其王本大月

氏王寄多羅子也寄多羅為匈奴所逐西徙後令其子守此城因號小月氏 罽賓國北與

大月氏接匈奴破大月氏大月氏西君大夏而塞王

南君罽賓

君謂為之君也

塞種分散往往為數國

即所謂釋種者也亦

語頗有

自疏勒以西北北休循捐毒之屬皆故塞種

也

烏孫國東與匈奴西北與康居西與大宛南與城郭
諸國相接本塞地大月氏居其地後烏孫昆莫破大
月氏大月氏徙西臣大夏而烏孫昆莫居之故烏孫

民有塞種大月氏種

龜茲國者西域之舊國者也後漢光武時其王名弘
為莎車王賢所殺滅其族賢使其子則羅為龜茲王

國又殺則羅匈奴立龜茲貴人身毒為王

西夜國王號子合東與皮山西南與烏耗北與莎車

西與蒲犁接蒲犁及依耐無雷國皆西夜類也西夜

與胡異其種類羗氏行國

言不土著也

中天竺國一名身毒身毒即天竺蓋傳譯音字不同

其實一也從月支高附以西南至西海東至盤越列

國數千里每國置王其各雖異皆身毒也或云摩伽

他 亦云婆羅門

昔有婆羅門領徒衆千人肄業於樹下樹神降之遂爲夫婦宮室自然而立僮僕甚盛於是使役百神築壘以繞之經日而就此後有阿育王復使鬼累石爲宮闕皆雕文刻鏤非人所及阿育王頗行苛政置炮灸之刑謂之地獄今城中見有其迹焉獅子國天竺旁國也其國舊無人民止有鬼神及龍居之諸國商估來共市易鬼神不見其形但出珍寶顯其所堪價商人依價取之諸國人聞其土樂因此競至或有停住者遂成大國

波斯國其先有波斯匿王者子孫以王父字爲氏因

爲國號

大食國大波斯之別種也隋大業中有波斯胡人牧駝於俱紛摩地那之山忽有獅子從地踊出人語謂胡人曰此山西有三穴穴中大有兵器汝可取之至穴中有刀及稍甚多石上有文教其反叛於是糾合亡命渡常曷水劫奪商旅其衆漸盛遂割據波斯西境自立爲王波斯拂菻各遣兵討之反爲所敗其王姓大食名噉密莫未賦至唐高宗時來朝貢自云有國已三十四年歷三王矣

蒲類本大國也前西域屬匈奴而其王得罪單于單

册府元龜 卷之九十五
于怒徙蒲類人六千餘口內之匈奴右部阿惡地因
號曰阿惡國南去車師後部馬行九十餘日人口貧
羸逃亡山谷間故留爲國

湟中月氏胡其先大月氏之別也舊在張掖酒泉地
月氏王爲匈奴冒頓所殺餘種分散西踰葱嶺其羸
弱者南入山阻旅諸羗居止遂與共婚姻

康國者康居之後也遷徙無嘗不忘故地然自漢以
來相承不絕其王本姓溫月氏人也舊居在連山北
昭武城因被匈奴所破西踰葱嶺遂有其國支庶各
分王故康國左右諸國並以昭武爲姓示不忘本也

燄汗國都葱嶺之西五百餘里古渠搜國也王姓昭
武字阿利浹

安國漢時安息國也王姓昭武氏與康國同族
何國都擲密木南數里舊是康居地也其王姓昭武
亦康國王之族類雜而

漕國在葱嶺之北漢時罽賓國也其王姓昭武字順
達康國王之宗族

烏那曷國都烏許水西舊安息之地也王姓昭武亦
康國種類

穆國都烏許河之西亦安息之故地與烏那曷爲隣

其王姓昭武亦康國之種類也

史國都獨莫水南十里舊康居之地也其王姓昭武亦康國王之支庶俗同康國

米國都那密水西舊康居之地也無王其城主姓昭武康國王之支

西羌之本出自三苗姜姓之別也其國近南岳及舜

流四凶徙之三危

三危山在今沙州燉煌縣東南

河關之西南羌地

是也其俗氏族無定或以父名母姓為種號秦厲公時有無弋爰劍者為秦所拘執以為奴隸不知爰劍何戎之別也後得亡歸而秦人追之急藏於巖穴中

得免羌人云爰劍初藏穴中秦人焚之有景象如虎

為其蔽火得以不死既出又與剗女遇於野遂成夫婦

婦女恥其狀被髮覆面羌人因以為俗遂俱亡入三

河間諸羌見爰劍被焚不死怪其神共畏事之推以

為豪河湟間少五穀多禽獸以射獵為事爰劍教之

田畜遂見敬信盧落種人依之者日益眾羌人謂奴

為弋以爰劍嘗為奴隸故因名之其後世世為豪至

爰劍曾孫忍之時秦獻公初立欲復穆公之迹兵臨

渭首滅狄獬戎獬音九忍季父邛畏秦之威將其眾種

人附落而南出賜支河禹貢所謂折支也曲西數千里與羌

絕遠不復交通其後子孫分別各自爲種任隨所之
或爲羆牛種越騫羗是也或爲白馬種廣漢羗是也
或爲叅狼種武都羗是也忍及弟舞獨留湟中並多
娶妻婦忍生九子爲九種舞生十七子爲十七種羗
之興盛從此起矣及忍子研立時秦孝公雄強威服
羗戎孝公使太子駟率戎狄九十二國朝周顯王研
至豪健故羗中號其爲後研種及秦始皇務并六國
以諸侯爲事兵不西行故種人得以繁息從爰劍種
五田至研研最豪健自後以研爲種號十三世至燒
當復豪健其子孫更以燒當爲種號西羗自爰劍後

子孫支分九百五十種其九種在賜支河首以西及
在蜀漢徼北前史不載口數惟叅狼在武都勝兵數
千人其五十二種衰少不能自立分散爲部落或絕
滅無後或引而遠去其八十九種惟研種最强勝兵
十餘萬其餘大者萬餘人小者數千人更相鈔盜盛
衰無嘗順帝時勝兵合可二十萬人發羗唐旄等絕
遠未嘗往來羆牛白馬羗在蜀漢其種別名號皆不
可紀知也

一云白蘭白狗
皆西羗別稱也

黃牛羗南與白馬隣各有種類孕身六月而生
黨頭羗者三苗之裔也其種有宕昌白狼皆自稱獮

猴種又云西羌之別種魏晉後西羌微弱其後連吐谷渾有大部落衆皆強盛其族有招祿等唐時有六府部落曰野利越詩野利龍兒野利厥律兒黃野海梅野宰等居慶州者號爲東山部落居夏州者號夏部落宕昌國在河南國之東南益州之西北隴西之西羌種也其先蓋三苗之裔

高昌國闞氏爲主其後爲河西王沮渠茂虔弟無諱襲破之其王闞爽本于苻苻無諱據之稱王一世而滅國人又據麴氏爲王名

嘉滑國者車師之別種也後漢永建元年入滑從班勇擊北虜有功勇上入滑爲後部親漢侯

白題國王姓支名史稽叅其先蓋匈奴之別也氏人有王所從來久矣自漢開益州置武都郡排其種人分窟山谷間或在福祿或在汧隴左右其種非一稱槃瓠之後或號青氏或號白氏或稱蚶氏此蓋蟲之類而處中國人卽其服色而名之也其自相號曰蓋雅各有王侯多受中國封拜漢建安中興國氏王阿貴白項氏王萬千各有部落萬餘至十六年從馬超爲亂超破之後阿貴爲夏侯淵所攻滅萬千西南入蜀其部落不能去皆降國家分徙其前後兩端者置

扶風美陽今之安夷撫夷二部護軍所典是也其太守善分留天水安南界今之廣平魏郡所守是也其俗語不與中國同及羗離胡各自有姓氏如中國之姓矣此蓋昔所謂西戎在於街莫源道者也今雖都統於郡國然故自有王侯在其虛落間又故武都地陰平街左右亦有一萬餘落

貲虜本匈奴也匈奴名奴婢爲貲始建武時匈奴哀分去其奴婢亡匿在金城武威酒泉北黑水西畜牧逐水草抄盜涼州部落稍多有數萬不與東部鮮卑同也其種非一有大胡有丁令或頗有羗雜處由本

上奴婢故也

畧陽清水氏楊氏秦漢以來世居隴右爲豪族漢獻帝建安中有楊騰者爲部落大帥騰子駒勇健多計畧始徙仇池

武興國本仇池宋文帝時楊難當自立爲秦王帝遣裴方明討之難當奔魏其兄子文德聚衆茄盧宋因授以爵位魏又攻之文德奔漢中從弟僧嗣又自立復盛茄盧卒文德弟文洪爲白水太守屯武興宋世以爲武都王武興之國自此始矣
鄧至羗者羗之種也有像舒治者世爲白水首帥乃

自稱王焉

契苾力何之先鐵勒別部之首長也父葛隋大業中繼為特勒以地逼吐谷渾所居隘狹又多瘴癘遂入龜茲居於熱海之上

河南王者其先出自鮮卑慕容氏初慕容維于子有二子庶長曰吐谷渾嫡曰瑰維于卒瑰嗣位吐谷渾避之西徙上隴度抱罕出涼州西南至赤水而居之地在河南故以為號其後吐谷渾孫葉延頗識書記自謂曾祖突維于始封昌黎公蓋公孫之子也禮以王父字為氏因姓吐谷渾亦為國號至其末孫阿豺

始通江左宋元嘉末阿豺弟子慕延又自號河南王吐蕃在吐谷渾之西本西羌別種南涼禿髮利鹿孤之後以禿髮為國音訛故曰吐蕃利鹿孤初有子曰樊泥奔沮渠蒙遜署臨松郡丞蒙遜滅建國西土改為勃宰野

厭噠國大月氏之種類也亦高車之別種

悅般國在烏孫西北去代一萬九百三十里其先匈奴北單于之部落也

焉耆國其王姓龍名鳩鳩卑那即前涼張軌所討龍熙之嗣

北狄匈奴其先夏后氏之苗裔曰淳維匈奴始記名殷時始奔北

唐虞以上有山戎獫狁薰鬻皆匈奴別號獫狁音險鬻音七六切居

於北邊其後周文王伐畎夷畎音土犬切又曰昆或作混緄二字並工本切

混緄吹聲相近耳山海經云黃帝生苗龍苗龍生融吾融吾生弄明弄明生白犬白犬生二兆壯是為犬

戎穆王伐畎戎宣王伐獫狁秦襄公齊桓公伐山戎

至於晉文公攘戎翟居於西河間雒之間間音帶水名水聲之

和因名也山上郡即今銀州銀水是也雒水亦謂之漆沮也號曰赤翟白翟春秋

晉師滅赤狄潞氏卻缺獲白翟子者而秦穆公得繇余西戎八國服於

秦故隴以西有縣諸畎戎狄獯之戎皆在天水界即縣諸遊及獯道

是也獯音垣在岐梁涇漆之北有義渠大荔烏氏胸衍之

戎北漆水在新平荔音隸氏音支胸音許于切而晉北有林胡樓煩之戎

燕北有東胡山戎烏嘗之先也後為鮮卑各分散谿谷自有君

長往而聚者百有餘戎然莫能相一趙襄子踰句注

而破之并代以臨胡貉貉音莫泊切秦始皇時匈奴單于

曰頭曼音莫安切姓孛鞮氏孛音力全切鞮音丁奚切其大臣皆世官

呼衍氏蘭氏呼衍即今鮮卑姓呼者是也蘭今亦有之其後有須卜氏此

三姓其遺種也西晉時北狄以部落為類其入居塞

者有屠各種鮮支種寇頭種烏譚種赤勒種桿蛭種

黑狼種赤沙種鬱鞞種萎莎種秃童種勃菴種羗渠

種賀賴種鍾鼓種大樓種雍屈種真樹種力羯種凡

十九種皆有部落相雜錯屠各最豪貴故得為單于
統領諸種南匈奴醯落尸逐鞬單于北者醯音火兮切北單于

名也呼韓邪單于之孫烏珠留若鞬單于之子也自呼

韓邪後諸子以次立至比季父單于與時以北為右

莫鞬日逐王部領南邊及烏桓莫音於六切鞬音凡言切後漢建

武二十四年冬自立為呼韓邪單于是年十二月癸

丑匈奴始分為南北單于

烏桓者本東胡也桓亦作丸漢初匈奴冒頓滅其國餘類

保烏桓山因以為號焉氏姓無嘗以大人健者名字

為姓

鮮卑亦東胡之餘也別保鮮卑山因號焉漢初亦為

冒頓所破遠竄遼東塞外與烏桓相接後漢建武二

十三年始通譯使桓帝時鮮卑檀石槐者其父投鹿

侯初從匈奴軍三年其妻在家生子投鹿侯歸怪欲

殺之妻言常晝行聞震雷仰天視而電入其口因吞

之遂妊身十月而產此子必有奇異且宜長視投鹿

侯不聽遂棄之妻私語家令收養焉名檀石槐其後

盡據匈奴故地東西萬四千餘里

蠕蠕蓋匈奴之別種也南史謂之芮芮姓郁久間氏後魏神

元之末掠騎有得一奴髮始齊眉忘本姓名其主字

日本骨間

言首秃也

木骨間與郁久間聲相近故後子孫

因以為氏木骨間既壯免奴為騎卒穆帝時坐後期

當斬

臣欽若等曰神元穆帝皆後魏追封帝號

亡匿廣漠谿谷間收合逋

逃得百餘人依純突隣部木骨間死子車鹿會雄健

始有部衆自號為柔然後太武以其無知狀類於蟲

故改其號為蠕蠕

突厥之先平涼雜胡也姓阿史那氏後魏太武滅且

渠氏阿史那以五百家奔茹茹世居金山工於鐵作

金山狀如兜鍪俗呼兜鍪為突厥因以為號或云其

先國於西海之上為隣國滅男女無少長盡殺之至

一兒不忍殺則足斷臂棄於大澤中有一牝狼每銜

肉至其所此兒因食之得以不死其後遂與狼交狼

有孕焉彼隣國者復令人殺此兒而狼在其側使者

將殺之其狼若為神所憑歛然至于海東止於山上

其山在高昌西北下有洞穴狼入其中遇得平壤茂

草地方二百餘里其後狼生十男其一姓阿史那氏

最賢遂為君長故牙門建狼頭毒示不忘本也又云

突厥之先出於素國在匈奴之北其部落大人阿諤

步兄弟十七人其一曰伊質泥師都狼所生諤步等

性亦愚癡國遂被滅泥師都既別感異氣能徵召風

兩娶二妻云夏神冬神之女一孕而生四男其一變為白鴻其一國於阿輔水之間號為契骨其一國於處析木其一居跋斯處析施山即其大兒也山上仍有阿謗步種類並多寒露火兒為出火溫養之成得全濟遂共奉火兒為主號為突厥即訥都六設也都六有十妻所生子皆以其母族為姓阿史那是其小妻之子也都六死十母子內欲擇立一人乃相率於大樹下共為約曰向樹跳躍能最高者推立阿史子年幼而跳最高諸子遂奉以為主號阿賢設此說雖殊然皆假種也其後口土門部落稍盛始至塞上市

繪絮願通中國

西突厥者突厥木杆可汗之子大邏便沙鉢也與沙鉢畧有隙古隙字因分為二其國則烏孫之故地也其人雜有都陸及弩失畢歌羅祿處月處密伊吾等諸種

沙陁突厥本西突厥之別種也唐則天通天中有黑離軍討擊使沙陁金山為金蒲州都督其後又有沙陁骨咄支沙陁盡忠等十餘人皆官至將軍仍兼金蒲州都督元和三年廻鶻破涼州吐蕃意沙陁致之欲西徙以散弱其類沙陁遂舉帳東來轉戰三千餘

里本出甘州有九千餘人五月到靈州者小纜二千
 餘人橐駝千餘頭馬六七百匹餘皆戰死餒死及散
 失范希朝時為靈武節度為市牛羊孳息群牧鳳翔
 興元太原等數道後得迸落之餘歸之靈州四年八
 月范希朝移鎮太原詔汝陁舉軍隨之希朝奏選一
 千二百人為軍其餘種落本欲置之大同川其川接
 生奚路慮河冰合其眾西走遂居之於襄州谷中
 退渾者本吐谷渾之族音訛曰退渾唐至德後吐蕃
 彊盛乃徙居陰山赫連鐸則退渾之首帥咸通中以
 從康承訓破龐勳有功補陰山都督

都國波鐵勒之別種也

霫匈奴之別種也

稽胡一曰步落稽蓋匈奴別種劉元海五部之苗裔
 也或云山戎赤狄之後離石以西安定以東方七八
 百里居山谷間種落繁熾

高車蓋古赤狄之別種也或云其先匈奴之人也其
 種有狄氏袁紇氏斛律氏斛毗氏護氏異奇斤氏又
 曰高車之族有十二姓一曰泣伏利氏二曰吐盧氏
 三曰乙旃氏四曰大連氏五曰窟賀伏氏六曰達薄
 于氏七曰阿喻氏八曰莫允氏九曰侯分氏十曰副

伏羅氏十一日乞袁氏十二日右升沛氏

破六韓匈奴單于之裔也右金蠶王潘六受浞於魏
其子孫遂以潘六奚爲氏後人訛誤以爲破六韓世
領部落

鐵勒之先匈奴之苗裔也種類最多自西海之東依
據山谷往往不絕獨維河北有僕骨同羅韋紇扶也
占覆羅並號俟斤蒙陳吐如紇斯結渾對薛等諸姓
勝兵二萬伊吾以西焉耆之北傍白山則有契獎薄
落職乙啞蘇婆那曷烏灌紇骨也啞於尼灌等勝兵
可二萬金山西南有薛延陀啞勒兒十槃達契等一

萬餘兵康國北傍阿得水則有訶啞易截撥忽比于
具海曷比悉何嗟蘇板也未渴達等有二萬許兵得
崑海東西有蘇路羯三索咽篋促薛忽等諸姓八千
餘拂菻東則有恩屈阿蘭北褥九離伏温昏等二萬
人北海南則都波等雖姓氏各別總謂鐵勒並無君
長屬東西兩突厥

薛延陀者鐵勒之別部也本姓薛氏其先挾滅延陀
而有其衆因號爲薛延氏又云與薛部雜居因號薛
延陀可汗姓壹利咄氏代爲強族初茹茹之滅也並
屬於突厥至隋開皇中啓民滅都濫鐵勒亡敗依于

西藩至曷婆那可汗徵稅無度鐵勒咸怨遂以延咄之祖乙失以爲野啞可汗居燕末山及射匱之立也又臣於突厥乃去可汗之號而部落中分在鬱督軍山者東屬於姑畢在貪汗山者西屬於葉護國亂乙失鉢之孫曰夷男率其部落七萬餘家東歸於頡利迴紇其先匈奴之裔也在後魏時號爲鐵勒部落後謂之特勒特勒始有僕骨同羅韋紇拔也古覆羅並號俟斤後稱迴紇有時徙俟斤死其子曰菩薩部落以爲賢而立之迴紇之盛繇菩薩之興焉至唐貞觀二十年太宗受其降款爲置六府七州以迴紇部爲

瀚海府拜其俟利發吐度迷爲都督又以多賢爲燕然府僕骨爲金微府拔野古爲幽陵府周羅爲龜林府思結爲盧山府澤部爲臯蘭州斛薩爲厥州阿跌爲雞田州契苾爲榆林奚州白霫爲賓暗顏州開元中迴紇漸盛有九姓部落一曰藥羅葛卽可汗之姓二曰胡咄葛三曰咄羅勿四曰貌歇息訖五曰阿勿嚙六曰葛隆七曰斛溫索八曰藥勿葛九曰爰耶勿每一部落一都督後破拔慮密收一部落破葛邏祿收一部落各置都督一人統號一部落契丹古匈奴之種也其君長姓大賀氏唐貞觀二十

二年蕃長蕭哥率所部內屬乃置松莫府以蕭哥為
 都督賜李氏昭宗時其王欽德政衰別有部酋長耶
 律阿保機者最推雄勁族帳漸盛代欽德為王
 奚本東部胡之種也為慕容氏所破遺落者竄匿松
 漠之間曰庫莫奚初臣於突厥後稍強盛分為五部
 一曰辱紇主二曰莫賀弗三曰契箇四曰木昆五曰
 室得每部俟斤一人為其帥隨逐水草頗同突厥有
 阿會氏五部中為盛諸部皆歸之唐貞觀二十二年
 酋長可度者率所部內屬乃置饒樂府以可度者為
 都督賜姓李氏天祐初契丹兵力漸盛室韋奚霫
 亦

匈奴之別種也皆受制焉虜政苛虐奚之首領去諸怨之以

別部內附徙於媯州依北山而居漸至數千帳故有
 東西奚之號去諸卒子掃刺代立

室韋者契丹之別種也其國無君長有大首領十七
 人並號莫賀弗世管攝之而附於突厥至唐有九部

焉所謂嶺西室韋山北室韋黃頭室韋並大如者室
 韋小如者室韋婆芭烏戈切室韋訥北室韋駱駝室韋

並在柳城郡之東北近者二千五百里遠者六千二
 百里其北大山之北曰大室韋

韃韞者肅慎之苗裔也邑落俱有酋長不相總一凡

有七種其一號粟末部與高麗相接勝兵數千多驍武每寇高麗中其二曰伯咄部在粟末之北勝兵七千其三曰安車骨部在伯咄東北其四曰拂阻部在伯咄東其五曰號室部在拂阻東其六曰黑水部在安車骨西北其七曰白山部在粟末東南

黑水靺鞨後魏謂之勿吉有酋帥突地稽者隋末率其部落千餘家內屬處之營州煬帝授以遼西太守唐武德初以其部落置燕州以突地稽為總管開元十三年置黑水府以其首領為都督十六年賜姓李氏又其部類凡有七種一號曰粟末部二曰伯咄部

三曰安車骨部四曰拂涅部五曰號室部六曰黑水部七曰白山部

渤海靺鞨大祚榮本高麗別種也唐開元中高麗滅祚榮家屬東保桂婁之故地據東牟山築城居之祚榮驍勇善用兵靺鞨之眾及高麗餘燼稍稍歸之

